

四庫全書

經部

欽定四庫全書

經部

五禮通考卷二百二十三

詳校官侍郎臣劉躍雲

給事中臣溫常綬覆勘

總校官進士臣繆琪

校對官中書臣李荃

謄錄監生臣馮士新

欽定四庫全書

五禮通考卷二百三十三

刑部尚書秦蕙田撰

賓禮四

天子受諸侯蕃國朝覲

蕙田案三代以前五服之內諸侯定為朝聘之期大行人云侯服歲一見甸服二歲一見男服三歲一見采服四歲一見衛服五歲一

見是也九州之外謂之蕃國則有世見之禮
無朝覲之期自秦廢封建而朝禮遂亡漢魏
晉唐元明封建子弟雖有分土而朝覲未合
於古唐開元禮宋史禮志明集禮所載外蕃
朝見之禮尤詳今俱采錄以備賓禮云

書舜典既月乃日覲四岳羣牧 五載一巡守羣后四
朝敷奏以言明試以功車服以庸

竹書紀年帝堯十六年渠搜氏來朝 二十九年雋

僂氏來朝貢沒羽

帝舜九年西王母來朝

沈約曰西王母之來朝獻白環玉玦

二十五

年息慎氏來朝貢弓矢 四十二年元都氏來朝貢寶玉

右唐虞朝覲

春秋哀公七年左氏傳禹合諸侯于塗山執玉帛者萬

國

注諸侯執玉附庸執帛塗山在壽春東北

國語魯語禹致羣神于會稽之山防風氏後至禹殺而

戮之

注羣神謂主山川之君為羣神之主故謂之神防風汪芒氏之君名也違命後至故禹殺之

春秋昭公四年左氏傳夏啓有鈞臺之享

注啓禹子也河南陽翟縣

有鈞臺陂蓋啓享諸侯於此

竹書紀年帝啓元年癸亥帝即位于夏邑大饗諸侯

於鈞臺諸侯從帝歸於冀都大饗諸侯于璿臺

帝相七年于夷來賓

帝少康元年諸侯來朝賓虞公二年方夷來賓

帝發元年諸夷賓于王門再保墉會于上池

帝癸六年岐踵戎來賓 十一年會諸侯于仍 二
十二年商侯履來朝命囚履于夏臺 二十三年釋

商侯履諸侯遂賓于商

右夏朝覲

詩商頌長發受小球大球為下國綴旒何天之休不競

不綈不剛不柔敷政優優百祿是道

綈綴結也旒旌旗之垂者也休美也

湯既為天所命則受小玉謂尺二寸圭也受大玉謂珽也長三尺執圭措珽以與諸侯會同結定其心如旌旗之旒縵著焉擔負天之美譽為衆所歸鄉

朱子集傳小球大球之義未詳或曰小國大國所執之玉也

受小共大共為下國駿龐何天之龍敷奏其勇不震不

動不難不踈百祿是總

箋共執也小共大共猶所執措
小球大球也駿之言俊也龍當

作寵榮
名之謂

朱子集傳小共大共之義未詳或曰小國大國所共之貢也

竹書紀年帝癸二十八年商會諸侯于景亳

成湯十九年氏羌來貢

書伊訓惟元祀十有二月乙丑伊尹祠于先王奉嗣王
祇見厥祖侯甸羣后咸在

竹書紀年大戊二十六年西戎來賓王使王孟聘西
戎 六十一年東九夷來賓

河亶甲五年佻人來賓

盤庚七年應侯來朝

武丁三十四年王師克鬼方氏羌來賓

孟子武丁朝諸侯有天下猶運之掌也

詩商頌殷武維女荆楚居國南鄉昔有成湯自彼氐羌

莫敢不來享莫敢不來王曰商是常

氐羌夷狄國在西方者也享獻也

世見曰王維女楚國近在荊州之域居中國之南方而背叛乎成湯之時乃氐羌速夷之國來獻來見曰商王是吾常君也此所用責楚之義女乃速夷之不如

天命多辟設都于禹之績歲事來辟勿予禍適稼穡匪

解

彘多衆也來辟猶來王也天命乃令天下衆君諸侯立都于禹所治之功以歲時來朝覲于我殷王者勿

罪過與之禍適徒勅以勸民稼穡非可懈倦時楚不修諸侯之職此所用告曉楚之義也禹平水土弼成五服

而諸侯之國
定是以云然

朱子集傳言天命諸侯各建都邑於禹所治之地而皆以歲事來見於商以祈王之不謫曰我之稼穡不敢解也庶可以免咎矣言荆楚既平而諸侯畏服也

蕙田案此章鄭箋以為責楚之辭朱傳以為荆楚平而諸侯自相畏服之辭

竹書紀年祖甲十三年西戎來賓

武乙三十四年周公季歷來朝

帝辛三十年春三月西伯率諸侯入貢

右殷朝覲

書序巢伯來朝芮伯作旅巢命

傳巢殷之諸侯伯爵也南方遠國武王克

商慕義來朝

竹書紀年周武王十三年巢伯來賓十五年肅慎

氏來朝十六年箕子來朝

禮記明堂位武王崩成王幼弱周公踐天子之位以治天下六年朝諸侯于明堂

陳氏澹曰六年五服一朝蓋始于此

後漢書南蠻列傳交阯之南有越裳國周公居攝六年制禮作樂天下和平越裳以三象重譯而獻白雉曰道路悠遠山川阻深音使不通故重譯而朝成王以歸周公曰德不加焉則君子不享其質政不施焉則君子不臣其人吾何以獲此賜也其使請曰吾受命吾國之黃耆曰久矣天之無烈風雷雨意者中國有聖人乎有則盍往朝之周公乃歸之於王稱先王之神致以薦於宗廟

蕙田案此事亦見尚書大傳竹書紀年載在
成王十年與此不同

竹書紀年成王七年王如東都諸侯來朝 九年肅
慎氏來朝王使榮伯錫肅慎氏命

書序成王既伐東夷肅慎來賀王俾榮伯作賄肅慎

之命

傳海東諸夷駒麗扶餘馱貊之屬武王克商皆
通道焉成王即政而叛王伐而服之肅慎氏來

賀榮國名同姓諸侯為卿大夫王使
之為命書以幣賄賜肅慎之來賀

竹書紀年成王十年越裳氏來朝 二十四年於越

來賓 二十五年王大會諸侯于東都四夷來賓

三十年離戎來賓

詩小雅蓼蕭蓼蕭彼蕭斯零露漙漙既見君子我心寫兮

箋既見君子者遠國之君朝見于天子也燕笑語兮是以有譽處兮

箋天子與之燕

而笑語則遠國之君各得其所是以稱揚德美使聲譽常處天子

蓼彼蕭斯零露漙漙既見君子為龍為光

傳龍寵也箋為寵為光

言天子恩澤光耀被及已也其德不爽壽考不忘

蓼彼蕭斯零露泥泥既見君子孔燕豈弟宜兄宜弟令

德壽豈

蓼彼蕭斯零露濃濃既見君子倬革冲冲和鸞雖雖萬

福攸同

傳倬轡也革轡首也冲冲垂飾貌在軾曰和在
鑿曰鸞箋此說天子之車飾者諸侯燕見天

子天子必乘車迎於門是以云然疏燕見迎諸侯者
以王惟覲禮不下堂而見諸侯耳其朝宗當迎之故秋
官大行人說車迎之法賓主步數從六服諸侯尚有車
迎則四夷之君車迎可知燕主歡心不可不接既然迎
接不得無車故燕禮云若四方之
賓公迎之于大門內是燕有迎法

采菽采菽采菽筐之筥之君子來朝何錫予之雖無予

之路車乘馬又何予之玄衮及黼

傳與也菽所以芼太
牢而待君子也羊則

苦豕則徽君子謂諸侯也。玄衮卷龍也。白與黑謂之黼。箋。王饗賓客有生俎乃用銅羹。故使采之。賜諸侯以車馬。言諸無子之尚以為薄。玄衮玄衣而畫以卷龍也。黼黻謂飾衣也。諸公之服自衮冕而下。侯伯自鷩冕而下。子男自毳冕而下。王之賜維用有文章者。

威沸檻泉言采其芹君子來朝言觀其旂其旂淠淠鸞

聲嘒嘒載駟載馬君子所屆

傳威沸泉出貌檻泉正出也淠淠動也嘒嘒中節也

箋芹可以為菹亦所用待君子也屆極也嘒嘒來朝王使人迎之因觀其衣服車乘之威儀所以為敬且省禍福也諸侯將朝於王則駟乘乘四馬而往此之服飾君子法制之極也

朱子集傳見其旗聞其鸞聲又見其馬則知君子之至於是也

赤芾在股邪幅在下彼交匪紓天子所予樂只君子天

子命之樂只君子福祿申之

傳諸侯赤芾邪幅幅偏也所以自偏束也紓緩也

芾芾太古蔽膝之象也冕服謂之芾其他服謂之鞞以韋為之其制上廣一尺下廣二尺長三尺其頸五寸肩革帶博二寸脛本曰股邪幅如今行膝也偏束其脛自足至膝故曰在下彼與人交接自偏束如此則非有解急紓緩之心天子以是故賜與之只之言是也古者天子賜諸侯也以禮樂樂之乃後命予之也天子賜之神則以福祿申重之所謂人謀鬼謀也

朱子集傳言諸侯服此芾偏見於天子恭敬齊遯不敢紓緩則為天子所與而申之以福祿也

維柞之枝其葉蓬蓬樂只君子殿天子之邦樂只君子

萬福攸同平平左右亦是率從

傳殿鎮也平
平辨治也

朱子集傳左右諸侯之臣也又言
其左右之臣亦從之而至此也

汎汎楊舟緋纒維之樂只君子天子葵之樂只君子福

祿膍之優哉游哉亦是戾矣

傳葵揆也膍
厚也戾至也

蕙田案正小雅自由庚以下鄭氏詩譜以為
皆成王周公時詩采菽之序云刺幽王也侮
慢諸侯諸侯來朝不能錫命以禮數徵會之
而無信義君子見微而思古焉朱子以為此

詩與楚茨諸篇意相類疑正雅之篇錯脫在
此今讀其詩有美而無刺斷為正小雅之詩
但未詳其世姑附於成周之末

觀承案采菽詩是宣王美東諸侯來朝而次
於魚藻下則魚藻正是東諸侯美宣王之詩
耳今玩魚藻詩三歌王在在鎬恰對厲王在
彘而言則魚藻采菽皆宣王時東畿之雅可
信向來謂武王詩固謬或以為刺幽或以為

刺厲皆非也

竹書紀年康王元年甲戌春正月王即位命冢宰召康公總百官諸侯朝於豐宮

通鑑前編元子釗麻冕黼裳即位朝見諸侯于應門內諸侯聽命出王釋冕反喪服元年癸亥徧告諸侯朝于豐宮

竹書紀年穆王六年春徐子誕來朝錫命為伯 十五年春正月留昆氏來賓 十七年西王母來朝賓

于昭宮 十八年春正月王居祗宮諸侯來朝 三

十七年荆人來貢 三十九年王會諸侯于塗山

通鑑前編夷王元年天子始下堂見諸侯覲禮廢

史記周本紀宣王修政法文武成康之遺風諸侯復

宗周

詩小雅庭燎序庭燎美宣王也因以箴之

箴諸侯將朝宣王以夜未

央之時問夜早晚美者美其能自勤以政事因以箴者王有難人之官凡國事為期則告之以時王不正其官

而問夜早晚

夜如何其夜未央庭燎之光君子至止鸞聲將將旦也

庭燎大燭君子諸侯也將將鸞鑣聲 箋此宣王以諸

侯將朝夜起曰夜如何其問早晚之辭夜未央猶言夜

未渠央也而于庭設大燭使

諸侯早來朝聞鸞聲將將然

夜如何其夜未艾庭燎晰晰君子至止鸞聲噦噦傳艾

晰晰明也噦噦

徐行有節也

夜如何其夜鄉晨庭燎有輝君子至止言觀其旂傳輝

箋晨明也上二章聞鸞聲爾今夜鄉明

我見其旂是朝之時也朝禮別色始入

蕙田案蘇子由以為王將起視朝不安於寢

而問夜之早晚朱子集傳因之然國語稱諸
侯賓至甸設庭燎周官閭人大祭祀喪紀之
事設門燎賓客亦如之則庭燎惟諸侯來朝
乃設之若每日視朝辨色始入不用庭燎也
當從傳箋為是

竹書紀年宣王四年王命蹶父如韓韓侯來朝

大雅韓奕序韓奕尹吉甫美宣王也能錫命諸侯

箋梁山於

韓國之山最高大為國之鎮所望祀焉故美大其貌奕奕然謂之韓奕也梁山今在馮翊夏陽西北韓姬姓之

國也後為
晉所滅

朱子集傳韓侯初立來朝始受
王命而歸詩人作此以送之

奕奕梁山維禹甸之有倬其道韓侯受命王親命之續
戎祖考無廢朕命夙夜匪解虔共爾位朕命不易韜不

庭方以佐戎辟

傳奕奕大也甸治也禹治梁山除水災
宣王平大亂命諸侯有倬其道有倬然

之道者也受命受命為侯伯也 箋梁山之野堯時俱
遭洪水禹甸之者決除其災使成平田定貢賦于天子
周有厲王之亂天下失職今有倬然著明復
禹之功者韓侯受王命為諸侯我猶女也

朱子集傳受命蓋即位除喪以士服入見天子而聽
命也續繼戎女也言王錫命之使繼世而為諸侯也

榦正也不庭方
不來庭之國也

四牡奕奕孔脩且張韓侯入覲以其介圭入覲于王

錫韓侯淑旂綏章篚第錯衡玄衮赤舄鈎膺鏤錫鞞鞞

淺幘倕革金厄

傳淑善也交龍為旂綏大綏也錯衡文
衡也鏤錫有金鏤其錫也鞞革也鞞鞞

中也淺虎皮淺毛也幘覆式也厄烏蠲也

箋諸侯秋

見天子曰覲韓侯乘長大之四牡奕奕然以時覲于宣

王親于宣王而奉享禮貢國所出之寶善其尊宣王以
常職來也書曰黑水西河其貢璆琳琅玕王為韓侯以

常職來朝享之故故多錫以厚之善旂旂之善色者也
綏所引以登車有采章也篚第漆篚以為車蔽今之藩

也鈎膺樊纓也眉上曰錫刻金飾之今當盧也倕革謂
轡也以金為小環往往纏楫之疏毛于崧高以介圭

為所執之瑞則此介圭亦為瑞也以其介圭入覲于王謂正行覲禮箋以鞞侯入覲為行覲禮入覲于王為行享禮行享而云介圭則圭是為享之物綏大綏者即王制所謂天子殺下大綏者是也天官夏采注云徐州貢夏翟之羽有虞氏以為綏後代或無染鳥羽象而用之或以旌牛尾為之綴于幢上然則綏者即交龍旂竿所建與旂共一竿為貴賤之表章故云綏章鞞鞞者蓋以丟毛之皮施于軾之中央持車使牢固也幟字禮記作帀周禮作幟字異而義同玉藻言羔帀鹿帀春官巾車言犬幟豸幟皆以有毛之皮為帀此云淺幟則以淺毛之皮為幟也獸之淺毛者惟虎耳少儀說御車之法云負良綏申之面拖諸帀明在式上故知覆軾也厄烏蠲釋蟲文郭璞曰大蟲如指如蠶毛以厄為厄蟲則金厄者以金接轡之端如厄蟲也箋以此經所陳其事各別若綏共旂一物淑旂可以兼之不應重出其文故易傳以綏為所引登車者綏是升車之索當以采絲為之故

云綏章鏤錫施鏤于錫之上釋器云金謂之鏤故知刻金為飾當虛者當馬之額虛在眉眼之上案巾車玉路錫樊纓金路鈎鈎樊纓注云金路無錫有鈎計玉路非賜臣之物此言鈎膺必金路矣而得有鏤錫者蓋特賜之使得施於金路也

曹氏粹中曰既覲則王班圭而復之乃以車馬旗服賜焉

蕙田案此章述韓侯入覲儀節與覲禮互相發明四牡奕奕孔修且張韓侯入覲即覲禮之乘墨車乃朝也以其介圭入覲于王即覲禮侯氏入門右坐奠圭再拜稽首也王錫韓

侯以下即覲禮天子賜侯氏以車服也介圭
即五等諸侯所受之瑞毛義蓋得之箋以為
享禮之圭璧非也

韓侯出祖出宿于屠顯父餞之清酒百壺其殽維何魚
鼈鮮魚其藪維何維筍及蒲其贈維何乘馬路車邊豆

有且侯氏燕胥

傳屠地名顯父有顯德者也藪菜殽也
筍竹也蒲蒲蒻也箋祖將去而祀軼

也既覲而反國必祖者尊其所往去則如始行焉祖于
國外畢及出宿示行不留于是也顯父周之公卿也餞
送之故有酒贈送也王既使顯父餞之又使送以車馬
所以贈厚意也人君之車曰路車所駕之馬曰乘馬且

多貌昏皆也諸侯在京師未去者于顯父餞之時皆來相與燕其籩豆且然榮其多也疏諸侯反國為王臣所送送者惟卿士耳故知顯父周之卿士也車馬嫌是顯父所贈卿大夫無乘馬路車之名則非顯父贈之明是王贈之也言侯而不言韓侯且韓侯一人不足稱皆故知諸侯在京師未去者于是之時皆來相與燕也

蕙田案觀禮於饗禮乃歸之下無侯氏出祖釋軼及卿士出餞之文此詩所陳可補儀禮之未及至乘馬路車之贈又在錫車服之外出于一時特典未必為常制也

韓侯取妻汾王之孫蹶父之子韓侯迎止于蹶之里百

兩彭彭八鸞鏘鏘不顯其光諸娣從之祁祁如雲韓侯

顧之爛其盈門

傳蹶父卿士也諸侯一取九女二國媵之諸娣衆妾也

朱子集傳此言韓侯既覲而還遂以親迎也

蹶父孔武靡國不到為韓姑相攸莫如韓樂孔樂韓土
川澤訏訏魴鱟甫甫麀鹿嘯嘯有熊有羆有貓有虎慶

既令居韓姑燕譽

傳姑蹶父姓也

唐氏汝諤曰雖敘韓姑歸韓之樂亦以見韓封域之美也

溥彼韓城燕師所完以先祖受命因時百蠻王錫韓侯

其追其貊奄受北國因其伯實墉實壑實畝實籍獻

其貊皮赤豹黃羆

傳師衆也韓侯先祖武王之子也因時百蠻長是蠻服之百國也追貊戎

狄國也奄撫貊猛獸也追貊之國來貢而侯伯總領之

箋溥大也燕安也大矣彼韓國之城乃古平安時衆

民之所築完韓侯先祖有功德者受先王之命封為韓侯居韓城為侯伯其州界外接蠻服因見使時節百蠻貢獻之往來後君微弱用失其業今王以韓侯先祖之事如是而韓侯賢故于入覲使復其先祖之舊職賜之蠻服追貊之戎狄令撫柔其所受王畿北面之國因其先祖侯伯之事盡予之皆美其為人子孫能興復先

祖之功

朱子集傳燕召公之國也韓初封時召公為司空王命以其衆為築此城如召伯營謝山甫城齊春秋諸

侯城邢城楚
邱之類也

竹書紀年宣王八年魯武公來朝錫魯世子戲命

九年王會諸侯于東都

史記周本紀十二年魯武公來朝

春秋隱公六年左氏傳鄭伯如周始朝桓王也王不禮
焉周桓公言于王曰我周之東遷晉鄭焉依善鄭以勸
來者猶懼不旣况不禮焉鄭不來矣

史記周本紀桓王三年鄭莊公朝桓王不禮

隱公八年左氏傳八月丙戌鄭伯以齊人朝王禮也

桓公五年左氏傳王奪鄭伯政鄭伯不朝

僖公二十八年五月公朝于王所

王在踐土非京師故云王所

公

羊傳曷為不言公如京師天子在是也曷為不言天子在是不與致天子也 穀梁傳朝不言所言所者非其所也

冬公朝于王所

文公元年左氏傳晉侯朝王于溫

成公十三年三月公如京師

注伐秦道過京師因朝王

左氏傳公

如京師宣伯欲賜請先使王以行人之禮禮焉孟獻子從王以為介而重賄之

夏五月公自京師遂會晉侯齊侯宋公衛侯鄭伯曹伯邾人滕人伐秦左氏傳公及諸侯朝王遂從劉康公

成肅公會晉侯伐秦公羊傳其言自京師何公鑿行

也公鑿行奈何不敢過天子也

注鑿猶更造之意時本欲直伐秦塗過京師不

敢過天子而不朝復生事修朝禮而後行故起時善而褒成其意使若故朝然後生事也間無事復書公者善

公鑿行

穀梁傳公如京師不月月非如也非如而曰如

不叛京師也

注公行出竟有危則月朝聘京師理無危懼故不月因其過朝故正其文若使本自

往

胡氏安國曰諸侯每歲侵伐四出未有能修朝覲之禮者今公欲會伐秦道自王都不可越天子而往也故皆朝王而不能成朝禮書曰如京師見諸侯之慢也因會伐而行矣又書公自京師以伐秦為遂事者此仲尼親筆明朝王為重存人臣之禮也古者諸侯即位服喪畢則朝小聘大聘終則朝巡守于方獄則朝觀春秋所載天王遣使者屢矣十二公之述職蓋闕如也獨此年書公如京師又不能成朝禮不敬莫大焉

汪氏克寬曰經書朝王之禮者三僖公朝王所為會
晉而行成公如京師為伐秦而往皆非有尊周之本
心也然僖二十八年書公會諸侯盟于踐土公朝于
王所公會諸侯于温天王狩于河陽公朝于王所使
若諸侯先會而後朝王去其實以全名也此年書公
如京師遂會伐秦使若請命而往伐正其名以統實
也然書乞師于前書至伐于後則見朝京師實因行
以見王而簡慢之罪視僖公不侔矣或曰一經之中
魯君僅一如京師而貶之有如是者則朝者反得罪
而不朝者無譏與吁不朝之罪經不書而貶自著今
也因過京師而朝王苟不示譏而予之以朝則天下
後世將謂尊君之禮可以簡慢而欺世盜名挾天子
以令諸侯者又將借稟命伐秦之
例以為口實矣其關係豈淺淺哉

吳越春秋壽夢元年朝周

蕙田案以史記年表考之蓋在周簡王元年
通鑑前編敬王二年三月晉侯使士景伯朝于京師
年表烈王六年齊威王朝周

竹書紀年顯王十二年魯恭侯宋桓侯衛侯鄭釐侯
來朝 十五年東周與鄭高都鄭釐侯來朝中陽

史記周本紀顯王二十五年秦會諸侯于周

秦本紀孝公十九年天子致伯二十年諸侯畢賀秦
使公子少官率師會諸侯逢澤朝天子

竹書紀年赧王三年秦王來見于蒲阪關

右周

漢書高帝本紀九年冬十月淮南王梁王趙王楚王朝
未央宮 十年冬十月淮南王燕王荆王梁王楚王齊
王長沙王來朝

惠帝本紀二年冬十月齊悼惠王來朝

文三王傳梁孝王武以孝文二年立孝王十四年入朝
十七年十八年比年入朝留二十一年入朝二十四年

入朝二十五年復入朝二十九年十月入朝三十五年
冬復入朝

代孝王參五年一朝凡三朝

梁懷王揖五年一朝凡再入朝

景十三王傳河間獻王德武帝時來朝獻雅樂對三雍
宮

武帝本紀元朔二年冬賜淮南王菑川王几杖毋朝

天漢四年春正月朝諸侯王于甘泉宮

後元二年春正月朝諸侯王于甘泉宮

昭帝本紀元鳳五年春正月廣陵王來朝

哀帝本紀帝定陶恭王子也年三歲嗣立為王元延四年入朝盡從傅相中尉時成帝少弟中山孝王亦來朝獨從傅上怪之以問定陶王對曰今諸侯王朝得從其國二千石傅相中尉皆國二千石故盡從之他日問中山王獨從傅在何法令不能對

後漢書世祖本紀中元元年春正月東海王疆沛王輔

楚王英濟南王康淮陽王延趙王盱皆來丁卯東巡守
二月幸太山北海王興齊王石朝于東嶽

明帝本紀永平二年秋九月沛王輔楚王英濟南王康
淮陽王延東海王政來朝 六年春正月沛王輔楚王
英東平王蒼淮陽王延琅邪王京東海王政趙王盱北
海王興齊王石來朝冬十月行幸魯十二月壬午車駕
還宮東平王蒼琅邪王京從駕來朝皇太后 十一年
春正月沛王輔楚王英濟南王康東平王蒼淮陽王延

中山王焉瑯琊王京東海王政來朝

章帝本紀建初七年春正月沛王輔濟南王康東平王
蒼中山王焉東海王政瑯琊王京來朝

東平王蒼傳建初六年冬蒼上疏求朝明年正月帝
許之特賜裝錢千五百萬其餘諸王各千萬帝以蒼
冒涉寒露遣謁者賜貂裘及大官食物珍果使大鴻
臚竇固持節郊迎帝乃親自循行邸第豫設帷牀其
錢帛器物無不充備下詔曰禮云伯父歸寧乃國詩

云叔父建爾元子敬之至也昔蕭相國加以不名優忠賢也况兼親尊者乎其沛濟南東平中山四王讚皆勿名蒼既至升殿乃拜天子親答之其後諸王入宮輒以輦迎至省閣乃下蒼以受恩過禮情不自寧上疏辭曰臣聞貴有常尊賤有等威卑高列序上下以理陛下至德廣施慈愛骨肉既使奉朝請咫尺天儀而親屈至尊降禮下臣每賜讌見輒興席改容中宮親拜事過典故臣惶怖戰慄誠不自安每會見跋

踏無所措置此非所以章示羣下安臣子也帝省奏
嘆息愈褒貴焉三月大鴻臚奏遣諸王歸國帝特留
蒼賜以祕書列僊圖道術祕方至八月飲酎畢有司
復奏遣蒼乃許之手詔賜蒼曰骨肉天性誠不以遠
近為親疎然數見顏色情重昔時念王久勞思得還
休欲署大鴻臚奏不忍下筆顧授小黃門中心戀戀
惻然不能言于是車駕祖送流涕而訣復賜乘輿服
御珍寶輿馬錢布以億萬計

元和元年春正月中山王焉來朝

章和二年春正月濟南王康阜陵王延中山王焉來朝
安帝本紀建光三年二月辛卯幸泰山齋王無忌北海
王普樂安王延來朝

順帝本紀永建二年春正月戊申樂安王鴻來朝

蕙田案以上諸侯王來朝

又案自秦廢封建之後漢初立異姓諸侯王
不過元功數人不久夷滅於是尊王子弟大

啓藩封有非劉氏不王之誓文景以降稍示
裁抑而終兩漢之世皇子無不裂土而王者
其來朝也恒以家人禮待之至章帝於東平
諸王親自答拜讚皆不名紀之史冊傳為美
談雖朝覲之儀未合於古而敦睦之德猶有
可稱魏晉以後茲風遠矣其紀傳所載諸侯
王來朝之文今皆從略

漢書西域傳龜茲王絳賓愛其夫人上書言得尚漢外

孫為昆弟願與公主女俱入朝元康元年遂來朝賀王
及夫人皆賜印綬夫人號稱公主賜以車騎旗鼓歌吹
數十人綺繡雜繒琦珍凡數千萬留且一年厚贈送之
宣帝紀甘露二年冬十二月匈奴呼韓邪單于款五原

塞願奉國珍朝三年正月

師古曰欲于甘露
三年正月行朝禮

詔有司議咸曰

聖王之制施德行禮先京師而後諸夏先諸夏而後夷
狄詩云率禮不越遂視既發相土烈烈海外有截陛下
聖德充塞天地光被四表匈奴單于鄉風慕義舉國同

心奉珍朝賀自古未有也單于非正朔所加王者所
客也禮儀宜如諸侯王稱臣昧死再拜位次諸侯王下
詔曰蓋聞五帝三王禮所不施不及以政今匈奴單于
稱北藩臣朝正月朕之不逮德不能宏覆其以客禮待
之位在諸侯王上

三年春正月行幸甘泉匈奴呼韓邪單于稽侯罽來朝
贊謁稱藩臣而不名賜以璽綬冠帶衣裳安車駟馬黃
金錦繡繒絮使有司道單于先行就邸長安宿長平上

自甘泉宿池陽宮上登長平阪詔單于毋謁其左右當
戶之羣皆列觀蠻夷君長王侯迎者數萬人夾道陳上
登渭橋咸稱萬歲單于就邸置酒建章宮饗賜單于觀
以珍寶二月單于罷歸

匈奴傳單于正月朝天子於甘泉宮漢寵以殊禮位
在諸侯王上贊謁稱臣而不名賜以冠帶衣裳黃金

璽韞綬

師古曰韞古庚字庚艸名也
以庚染綬亦諸侯王之制也

玉具劍佩刀弓

一張矢四發棨戟十安車一乘鞞勒一具馬十五匹

黃金二十斤錢二十萬衣被七十七襲錦繡綺縠雜帛八千匹絮六千斤禮畢使使者道單于先行宿長平上自甘泉宿池陽宮上登長平詔單于毋謁師古曰不也今拜其左右當戶之羣臣皆得列觀及諸蠻夷君長王侯數萬咸迎于渭橋下夾道陳上登渭橋咸稱萬歲單于就邸留月餘遣歸國

黃龍元年春正月匈奴呼韓邪單于來朝禮賜如初二月單于歸國

匈奴傳呼韓邪單于復入朝禮賜如初加衣百一十襲錦帛九千匹絮八千斤

元帝紀竟寧元年春正月匈奴呼韓邪單于來朝詔曰
虜韓邪單于不忘恩德嚮慕禮義復脩朝賀之禮願保
塞傳之無窮邊垂長無兵革之事其改元為竟寧

匈奴傳單于復入朝禮賜如初加衣服錦帛絮皆倍
於黃龍時

成帝本紀河平四年春正月匈奴單于來朝二月單于

罷歸國

匈奴傳單于入朝加賜錦繡繒帛二萬疋絮二萬斤
他如竟寧時

哀帝紀元壽二年春正月匈奴單于烏孫大昆彌來朝
匈奴傳故事單于朝從名王以下及從者二百餘人
單于又上書言蒙天子神靈人民壯盛願從五百人
入朝以明天子盛德上皆許之上以太歲厭勝所在
舍之上林苑蒲陶宮告之以加敬於單于單于知之

加賜衣三百七十襲綿繡繒帛三萬疋絮三萬斤它
如河平時

西域傳元壽二年大昆彌伊秩靡與單于並入朝漢
以為榮

後漢書世祖本紀建武二十五年春正月烏桓大人來
朝三十年春正月鮮卑大人內屬朝賀

冊府元龜順帝永和元年夫餘國王來朝京師帝作黃
門鼓吹角抵戲以遣之

後漢書獻帝本紀建安二十一年秋七月南匈奴單于來朝

南匈奴傳建安二十一年單于來朝曹操因留於鄴而遣去俾歸監其國焉

冊府元龜南單于呼厨泉將其名王來朝待以客禮遂留內侍而匈奴折節過於漢舊是時曹公破三郡烏丸還至易水代郡烏丸行單于普富盧上郡烏丸行單于那樓將其名王來賀

蕙田案以上漢外藩入朝

右兩漢

通典魏制藩王不得朝觀明帝時有朝者皆由特恩不得為常

晉書禮志武帝太始中有司奏諸侯之國其王公以下入朝者四方各為二番三歲而周周則更始臨時有故則明年來朝明年朝後更滿三歲乃朝不得違本數朝禮皆執璧如舊朝之制不朝之歲各遣卿奏聘詔可

東晉王侯不之國其有受任居外則同方伯刺史二千石之禮亦無朝聘之制

通典後周初梁主蕭譽來朝入畿大冢宰命有司致積其餼五牢米九十筥醢醢各三十五甕酒十八壺米禾各五十車薪芻各百車既至大司空設九儻以致館梁主束帛乘馬設九介以待之禮成而出明日梁主朝受享於廟既致享大冢宰又命公一人玄冕乘車陳九儻以束帛乘馬致食于賓及賓之從各有差致食訖又命公

一人弁服乘車贄設九儐以勞賓梁主設九介迎于門
外明日朝服乘車還贄于公公皮弁迎于大門授贄受
贄並於堂之中楹又明日梁主朝服設九介乘車備儀
以見于公事畢公致享明日三孤一人又執贄勞于梁
主明日梁主還贄又明日梁主見三孤如見三公明日
卿一人又執贄梁主見卿又如三孤于是三公三孤六
卿人各餼賓並屬官之長為使宰米帛同三公

自泰平
天下朝

覲禮廢及後周立蕭啓為
梁主稱蕃國始有此儀

隋書禮儀志開皇四年正月梁主蕭歸朝于京師次于郊外詔廣平王楊雄吏部尚書韋世康持節以迎衛尉設次于館驛雄等降就便幕歸服通天冠絳紗袍端珪立于東階下西面文武陪侍如其國雄等立于門右東面歸攝內史令柳顧言出門請事世康曰奉詔勞于梁帝顧言入告歸出迎于館門外西面再拜持節者導雄與歸俱入至于庭下歸北面再拜受詔訖雄等乃出立于館門外道右東向歸送于門外西面再拜及奉見帝

冠通天冠服絳紗袍御大興殿如朝儀歸服遠遊冠朝服以入君臣並拜禮畢而出

文獻通考馬氏曰自秦兼天下朝覲之禮遂廢及周封蕭譽為梁王訖於隋恒稱藩國始有朝見之儀

蕙田案以上隋諸侯王來朝

煬帝本紀大業八年六月車駕次榆林郡突厥啓民可汗來朝七月啓民可汗上表請變服襲冠帶詔啓民贊拜不名位在諸侯王上

大業五年六月高昌王麴伯雅來朝

七年十二月西面突厥處羅多利可汗來朝上大悅接以殊禮

蕙田案以上隋外藩朝見

右魏晉至隋

通典貞觀二十年有司言案史記正月諸侯朝賀凡四人留長安不過二十日今請每春二王入朝禮畢還蕃從之

蕙田案唐初諸王皆出就國故有朝賀之禮
中睿以後親藩徒擁虛號及其亡也皇子有
不出閣者矣

又案以上唐諸王朝見

唐開元禮

蕃王來朝以東帛迎勞

前一日守宮設次於候館門之外道右南向其日使者
至掌次者引就次蕃主服其國服所司引立於東堂下

西面

凡蕃主進止皆主司先引制使皆謁者前導

使者朝服出次立於門西

東面從者執東帛立於使者之南蕃主有司出門東西

面曰敢請事使者曰奉制勞某主

稱其國名

有司入告蕃主

迎於館門外之東西面再拜使者與蕃主俱入使者先
升立於西階上執東帛者從升立於使者之北俱東面
蕃主升立於東階上西面使者執幣稱有制蕃主將下
拜使者曰有後制無下拜蕃主旋北面再拜稽首使者

宣制訖蕃主進受幣

采五疋為一束其蕃主答勞各以土物其少多相准不得過勞幣勞

於遠郊其禮同蕃主還贈於遠郊亦如之勞蕃使即束帛也退復位以幣授左右又

再拜稽首使者降出立於館門之外西東面蕃主送於館門之外西面止答使者蕃主揖使者俱入揖讓升蕃主先升東階上西面使者升西階上東面蕃主以土物饋使者再拜受蕃主再拜送物使者降出蕃主從出門外皆如初蕃主再拜送使者還蕃主入鴻臚迎引詣朝堂依方北面立所司奏聞舍人承勅出稱有勅蕃主再拜宣勞訖又再拜所司引就館如常儀

遣使戒蕃主見日

前一日守宮設次于館門之外道右南向其日使者至
掌次者引就次蕃主服其國服降立于東階下西面蕃
國諸從官立于蕃主之後西面北上使者服朝服出次
立於門西東面蕃主有司出門東西面曰敢請事使者
曰奉制戒集某主見日有司入告蕃主迎于館門外之
東西面再拜使者與蕃主俱入使者升自東階西面使
者稱有制蕃主再拜宣制曰某日見蕃主又再拜稽首

使者降出蕃主送於館門之外西面再拜使者還蕃主
入

蕃主奉見

奉辭
禮同

前一日尚舍奉御整設御幄於太極殿北壁南向守宮
設次太樂令展宮懸設舉麾位於上下鼓吹令設十二
案乘黃令陳車輅尚輦奉御陳輿輦尚舍奉御鋪蕃主
坐于御座西南東向並如常儀設蕃主版位於懸南又
設蕃國諸官之位于蕃主後依其班重行北面以西為

上設典儀位於懸之東北贊者二人在南差退西面諸
衛各勒所部列黃麾仗屯門及陳于殿庭太樂令帥工
人入就位協律郎入就舉麾位所司迎引蕃主于承天
門外通事舍人引就次本司入奏鈸戟近仗入陳如常
典儀帥贊者先入就位侍中版奉請中嚴諸侍衛之官
各服其器服符寶郎奉寶俱詣閣奉迎蕃主服其國服
出通事舍人引立於閣外西廂東面若更有諸蕃以
國大小為序蕃
國諸官各服其服立於蕃主之後俱東面北上侍中版

奏外辨皇帝服通天冠絳紗袍乘輿以出曲直華蓋警蹕侍衛如常儀皇帝將出仗動太樂令令撞黃鐘之鐘右五鐘皆應協律郎舉麾鼓祝奏太和之樂及姑洗之音皇帝出自西房即御座南向坐符寶郎奉寶置于御座侍衛如常儀偃麾戛鼓樂止如常通事舍人引蕃主入門舒和之樂作至位樂止典儀曰再拜贊者承傳蕃主再拜稽首侍中承制降詣蕃主西北東面稱有制蕃主再拜稽首宣制訖蕃主又再拜稽首侍中面奏又承

制降勞敕命升坐蕃主再拜稽首舍人引蕃主樂作蕃
主上階樂止舍人接引至坐後蕃主就坐俛伏侍中承
制勞問蕃主俛伏避席將下拜侍中承制曰無下拜蕃
主復位對拜如常侍中回奏又承制勞還館舍人引蕃
主降自西階典謁者承引樂作復懸南位樂止蕃主再
拜稽首訖舍人引蕃主樂作蕃主出門樂止初蕃主升
坐舍人引蕃主諸官以次入就位立定典儀曰再拜贊
者承傳蕃國諸官俱再拜稽首舍人承敕降詣西階畔

蕃國諸官西北東面稱勅旨蕃國諸臣俱再拜稽首宣
勅訖蕃國諸官俱再拜稽首對訖又再拜稽首舍人回
奏又承勅降勞還館蕃國諸官俱再拜稽首於階蕃主
出舍人引蕃國諸官以次出訖侍中前跪奏侍中臣某
言禮畢俛伏興還侍位皇帝興太樂令令撞蕤賓之鐘
左五鐘皆應鼓祝奏太和之樂皇帝降座乘輿入自東
房侍衛警蹕如常儀侍臣從至閤樂止

皇帝宴蕃國主

前一日尚舍奉御整設御幄於御殿之北壁南向尚食奉御太官令命各具饌守宮設次太樂令設登歌於殿上展宮懸於殿庭舉麾位于上下鼓吹令設十二案乘黃令陳車輅尚輦奉御陳輿輦並如常儀其日尚舍奉御鋪蕃主牀坐于御座西南蕃國諸官應升殿者坐于蕃主之後設不升殿者坐席于西廊下俱東面北上尚食奉御設御酒樽太官令設蕃主以下酒樽並如常儀設蕃主版位于懸南又設蕃國諸官之位於蕃主之後

俱重行北面南上設典儀位於懸之東北如常儀諸衛
各勒所部列黃麾仗屯門及陳於殿庭太樂令帥工人
二舞入就位協律郎入就舉麾位所司迎引蕃主至承
天門外通事舍人引入次

凡蕃客出入升降皆掌客監引

所司入奏鈸

戟近仗入陳如常典儀帥贊者先入就位侍中版奏請
中嚴諸侍衛之官各服其器服符寶郎奉寶俱詣閣奉
迎蕃主服其國服出次通事舍人引立于閣外西廂東
面蕃國諸官各服其國服立於蕃主之後俱東面北上

侍中版奏外辨皇帝服通天冠絳紗袍乘輿以出曲直
華蓋警蹕侍衛並如常儀皇帝將出仗動太樂令令撞
黃鐘如上儀一人升立于東階上贊者二人立于階下
俱西面通事舍人引蕃主入蕃國諸官從入蕃主入門
舒和之樂作蕃主至位樂止其有獻物則從之入陳于
蕃主之前以西為上立定典儀曰再拜贊者承傳蕃主
及蕃國諸官皆再拜侍中承旨降勅蕃主升坐蕃主再
拜蕃主奉贄

真贄隨其國所有
一以輕者為之

曰某國蕃臣某敢獻壤

奠侍中升奏又侍中承旨曰朕其受之侍中降於蕃主
東北西面稱有制蕃主再拜宣制訖蕃主又再拜訖以
贊授侍中侍中以贊授所司又所司受其餘幣俱以東
舍人承旨降勅蕃國諸官等坐蕃國諸官俱再拜通事
舍人引蕃主又通事舍人引蕃國諸官應升殿者詣西
階蕃主初行樂作至階樂止通事舍人各引升立于坐
後初蕃國諸官詣西階其不升殿者通事舍人分引于
廊下席後立定殿上典儀唱就坐階下贊者承傳蕃主

以下皆就坐俛伏太樂令引歌者及瑟琴至階脫履于
下引就坐位笙管者就階間北面立尚食奉御進酒至
階殿上典儀唱酒至興階下贊者承傳蕃主以下皆俛
伏興立坐後殿中監到階省酒尚食奉御奉酒進皇帝
舉酒良醞令又行酒殿上典儀唱再拜階下贊者承傳
蕃主以下皆再拜訖搢笏受觶殿上典儀唱就坐階下
贊者承傳蕃主以下皆就坐俛伏坐飲皇帝初舉酒登
歌作昭和三終尚食奉御進受虛觶奠于坵登歌訖降

復位觴行三周尚食奉御進食食升階殿上典儀唱食
至興階下贊者承傳蕃主以下皆執笏俛伏興立坐後
殿中監到階省按尚食奉御品嘗食訖以次進置御前
太官令又行蕃主以下食案設訖殿上典儀唱就坐階
下贊者承傳蕃主以下皆就坐俛伏坐皇帝乃飯休和
之樂作蕃主以下皆飯御食畢樂止蕃主以下食訖尚
食太官俱徹案又行酒遂設庶羞二舞以次入作若賜
酒舍人前承旨詣受賜者前蒙賜者執笏俛伏起立坐

後舍人稱賜酒蒙賜者再拜酒至蒙賜者搯笏受觶就席俛伏坐飲卒觶俛伏起立授虛觶又再拜就席俛伏坐會畢通事舍人贊蕃主興蕃主以下皆俛伏興立坐後通事舍人引降樂作復懸南位立定典儀曰再拜贊者承傳蕃主以下皆再拜若有筐篚舍人前承旨降宣勅蕃主以下皆再拜太府帥其屬以衣物以次授之訖蕃主以下又再拜通事舍人引出樂作至門樂止侍中前跪奏稱侍中臣某言禮畢俛伏興還侍位皇帝興太

樂令令撞蕤賓之鐘如常儀

蕙田案以上亦見新唐書禮志而其文較略

今不重載

唐六典凡蕃國主朝見皆設宮縣之樂及黃麾仗若蕃國使則減黃麾之半 鴻臚卿之職凡四方夷狄君長朝見者辨其等位以賓待之

蕙田案以上唐外藩朝見

右唐

宋史禮志凡外國君長來朝皆宴於內殿近臣及刺史
正郎都虞候以上皆預太祖乾德三年五月十六日宴
近臣及孟昶于大明殿太平興國二年三月二十五日
吳越錢俶來朝宴於長春殿親王宰相節度使劉鋹李
煜皆預其君長來朝先遣使迎勞於候館使者朝服稱
制曰奉制勞某主國主迎於門外與使者俱入升階使
者執束帛稱有制國主北面再拜稽首受幣又再拜稽
首以土物饋使者再拜受國主送使者出鴻臚引詣朝

堂所司奏聞通事舍人承勅宣勞再拜就館翌日遣使
戒見日如儀又次日奉見於乾元殿設黃麾仗及宮懸
大樂典儀設國主位於縣南道西北向又設其國諸官
之位於其後所司迎引國主服其國服至明德門外通
事舍人引就位侍中奏中嚴皇帝服通天冠絳紗袍出
自西房即御位典儀贊拜國主再拜稽首侍中承制降
勞皆再拜稽首勅升坐又再拜稽首至坐俛伏避席侍
中承制曰無下拜國主復位次引其國諸官以次入就

位再拜並如上儀侍中又承制勞還館通事舍人引國
主降復位再拜稽首出其國諸官皆再拜以次出侍中
奏禮畢皇帝降坐其賜宴與受諸國使表及幣皆有儀
具載開寶通禮

右宋

元史禮樂志太祖元年大會諸侯王於鄂諾河即皇帝
位始建九旂白旗

明集禮元太祖五年輝和爾國王伊克呼圖來朝世祖至

元元年勅高麗國王植令修世見之禮六月植來朝於上都其後蕃國來朝俟正旦聖節大朝會之日而行禮馬

蕙田案元時宗室諸王分封西北邊外極遠之地及魯趙昌鄆高昌高麗諸國世世尚主比于宗王俱得專制一方自任其陪臣有古封建之遺意其來朝則有金銀鈔幣之賜史不絕書至受朝之儀史志未之詳焉

右元

明會典諸王朝見儀洪武二十六年定凡各王大朝行八拜禮常朝一拜叩頭禮伯叔兄見天子在朝行君臣禮於便殿內行家人禮伯叔兄坐東面西坐受天子四拜伯叔兄就于受禮位坐天子居正中南面坐以尚親親之義存君臣之禮

續文獻通考洪武初令親王每歲朝覲不得一同至一王還國無虞信報別王方聽來朝不拘歲月自長至幼

以嫡先至嫡者朝畢方及庶者亦分長幼而至周而復始毋失其序其諸王居邊者無警則依期來朝有警從便不拘常期

傅維鱗明書天子伯叔五十不朝兄弟孫姪六十不朝俱令世子代之

明會典穆宗隆慶元年令親王朝覲禮久不行今後不必具奏禮部通行各王府知會

蕙田案以上明諸王朝見

明集禮國朝蕃王來朝先遣應天府官迎勞既至館復遣省部設宴然後習儀朝見于奉天殿及見皇太子於東宮朝見畢錫宴以享之省府臺皆設席宴享及還遣官勞送出境今具其儀

迎勞儀注

蕃王至龍江驛驛令具某國蕃王姓名及蕃國從官名數報應天府應天府官稟知中書省及禮部禮部奏聞遣侍儀通贊舍人二人接伴遣應天知府至龍江驛禮

待前期館人於正廳陳設蕃王座於廳之西北東向設
應天知府座于廳之東南西向中設酒案及食案又設
蕃國從官及應天府從官座位於廳之耳房賓西主東
中設酒案及食案應天知府至館館人入告接伴舍人
引蕃王出迎蕃國從官後從既見接伴舍人引蕃王應
天知府分賓主而入蕃王升自西階應天府官升自東
階至廳蕃王東向立應天知府西向立接伴舍人唱鞠
躬拜興拜興平身蕃王及應天知府皆鞠躬拜興拜興

平身應天府官進詣蕃王前致禮待之意畢接伴舍人引蕃王及應天知府各就座所引應天府從官詣蕃王前唱鞠躬拜興拜興平身應天府從官皆鞠躬拜興拜興平身舍人又引蕃王從官詣應天知府前唱鞠躬拜興拜興蕃國從官皆鞠躬拜興拜興平身應天知府答鞠躬拜興拜興平身應天從官與蕃國從官俱詣耳房各再拜訖分賓主東西相向坐執事者舉食案進供於蕃王及應天知府之前耳房執事者各舉食案進供於

各官之前廳上執事者斟酒凡酒五行湯五品耳房亦酒五行湯五品宴畢舍人引應天知府降自東階蕃王降自西階送至館門外王入應天府官還從官皆以次出次日清晨應天府從官復伴送蕃王入至會同館禮部尚書奉旨即往館宴勞前期館人陳設蕃王及禮部尚書座次于正廳賓西主東中設酒案及食案及設蕃國從官及禮部從官座位於廳之耳房賓西主東中設酒案食案禮部尚書至館館人入告接伴舍人引蕃王

服其國服出迎蕃國從官以次後從既見接伴舍人引蕃王禮部尚書及蕃國從官禮部從官分賓主而入蕃王升自西階禮部尚書升自東階至廳蕃王東向立禮部尚書西向立蕃王從官立於蕃王之南稍後東向禮部從官立於尚書之南稍後西向接伴舍人唱鞠躬拜興拜興平身禮部尚書與蕃王皆鞠躬拜興拜興平身禮部尚書進詣蕃王前致禮待之意畢接伴舍人引蕃王禮部尚書詣座所引禮部從官詣蕃王前唱鞠躬拜

興拜興平身禮部從官皆鞠躬拜興拜興平身蕃王答拜舍人又引蕃國從官詣尚書前唱鞠躬拜興拜興平身蕃國從官皆鞠躬拜興拜興平身尚書答拜禮部從官與蕃國從官俱詣耳房舍人引分賓主唱鞠躬拜興拜興平身蕃國從官及禮部從官皆鞠躬拜興拜興平身舍人引就東西相向坐執事者舉食案進供於蕃王及禮部尚書之前耳房執事者各舉食案進供於蕃國從官禮部從官之前廳上執事者斟酒凡酒五行湯五

品上湯擊鼓行酒作細樂耳房酒五行湯三品不設樂
宴畢舍人引禮部尚書降自東階蕃主降自西階出館
門外蕃王乘馬行于道右禮部尚書亦乘馬行于道左
蕃王從官及禮部從官各乘馬於後同至會同館門外
下馬舍人引蕃王禮部尚書同入蕃王升自西階禮部
尚書升自東階至館次禮部尚書及從官出蕃王及蕃
國從官送至館門外對舉手揖蕃王入尚書及從官還
明日都堂又奏知命省臣一員詣會同館宴勞其陳設

座次酒數食品樂器皆如禮部尚書宴勞之儀

朝見儀注

前期禮部告示侍儀司諸執事引蕃王及蕃國從官具服於天界寺習儀三日擇日朝見前一日內使監陳御座香案於奉天殿如常儀尚寶司設寶案於御座前侍儀司設蕃王次及從官次于午門外設蕃王拜位于丹墀中道稍西及御座之南俱北向設蕃國從官拜位于蕃王後中道之東西依序重行北向設方物案位于丹

墀之北中道之東西設方物案于御前及丹墀之中設受方物官位于方物案之東西設文官侍立位于文樓之北西向北上武官侍立位於武樓之北東向北上殿前班指揮司官三員位於丹陛上東向光祿司官三員位於丹陛上西向侍從班起居注殿中侍御史尚寶卿位于殿上西向指揮司懸刀武官位于殿上東向拱衛司官位于奉天殿門之左右東西相向典牧所官位于仗馬之前東西相向宿衛鎮撫位于丹陛階下東西相

向宿衛百戶二十四員于宿衛鎮撫之南稍後東西相
向護衛千戶八員于殿東西門左右東西相向知班二
人位于蕃王拜位之北東西相向贊禮二人位于知班
之北東西相向典儀二人位于丹陛上之南東西相向
內贊二人位于殿上東西相向引蕃王舍人位于蕃王
之北東西相向引蕃王從官舍人位于從官之北東西
相向引文武班舍人位于文武班之北稍後東西相向
舉方物執事位于方物案之東西鳴鞭四人位于丹陛

上之南北向天武將軍四人位于丹陛上之四隅東西相向將軍二人位于殿上簾前東西相向將軍六人位于奉天殿門之左右東西相向將軍六人位于奉天門之左右東西相向是日金吾衛陳設甲士於午門外之東西列旗仗于奉天門外之東西拱衛司陳儀仗于丹陛上及丹墀之東西陳五輅于丹墀之南典牧所陳仗馬于文武樓之南東西相向陳虎豹于奉天門外和聲郎陳樂於丹墀蕃王拜位之南擊鼓初嚴禮部以方物案

陳於午門外舉案者就案催班舍人催文武官各朝服擊鼓次嚴引班引文武百官依品從齊班于午門外以北為上東西相向殿前班指揮光祿卿通班贊禮典儀內贊宿衛鎮撫護衛鳴鞭殿內外將軍各執事人俱入就位接伴舍人及引班引蕃王及蕃國從官立于午門方物案之前諸侍衛官各服其器服及尚寶卿侍從官入詣謹身殿奉迎擊鼓三嚴引班引文武官入就侍立位引班舍人引執事舉方物案前行引蕃王及從官由

午門西入金水西橋奉天西掖門至丹墀之西俟立侍儀版奏外辦御用監官跪奏皇帝服通天冠絳紗袍御輿以出尚寶卿捧寶及侍儀侍衛導從警蹕如常儀皇帝將出仗動大樂鼓吹振作陞御座樂止將軍捲簾尚寶以寶置於案鳴鞭司辰郎報時雞唱訖引禮引蕃王就位執事者舉案及蕃王從官各就位立定舉案執事者退就位贊禮唱鞠躬拜興拜興平身蕃王及從官鞠躬樂作拜興拜興平身樂止引禮導蕃王升殿行禮宣

方物狀官取方物狀與展方物狀官從行俱西陞陞樂作從西門入引禮立伺於門外內贊接引蕃王至御座前行禮位樂止宣方物狀官以方物狀置于案與展方物狀官退立于殿西內贊唱鞠躬拜興拜興平身蕃王鞠躬拜興拜興平身內贊唱跪蕃王跪蕃王稱茲遇欽詣皇帝陛下訖宣方物狀官詣案取狀跪于御座前之西展方物狀官同跪展宣訖俛伏興于西承制官前跪承制興詣蕃王前宣制云云訖內贊唱俯伏興拜興拜

興平身蕃王俛伏興拜興拜興平身內贊引蕃王及宣
方物狀官展方物狀官由西門出樂作降自西陞引禮
引復位樂止贊禮唱鞠躬拜興拜興拜興平身蕃
王及從官皆鞠躬樂作拜興拜興拜興平身樂止
贊禮唱禮畢侍儀奏禮畢鳴鞭皇帝興樂作警蹕侍從
導引至謹身殿樂止引禮導蕃王及從官出受方物官
受方物舉案執事各舉案出引班引文武百官以次出

見東官儀注

前一日禮部官以蕃王所獻東宮方物啓知前期內使
監於東宮陳設皇太子位於正殿侍儀司設蕃王幄次
及從官次于東門之外設蕃王拜位于殿門外及殿中
北向設蕃國從官拜位于殿下中道之東西北向設文
官侍從班位于殿庭之東武官侍從班位于殿庭之西
俱相向贊禮二人位于殿門外東西相向內贊二人位
於殿內承傳二人位于殿下俱東西相向引蕃王舍人
二人位于蕃王拜位之北東西相向引蕃國從官舍人

二人位于從官拜位之北東西相向引文武侍從班舍
人四人位于文武班之北稍後東西相向是日宿衛陳
甲士兵仗於東宮門外陳旗幟於中門外將軍六人於
殿門外之東西拱衛司陳設儀仗於殿下之東西及殿
前殿門之東西內使擎執于殿上之左右和聲郎陳樂
於殿庭之南質明執事者各就位蕃王服本國服朝賀
皇帝訖常服至東宮門外引班引文武官公服入就侍
從位內使監令啓知皇太子皮弁服引進導引出宮樂

作陞座樂止引班引蕃王入樂作就位樂止引班引蕃
國從官立候於殿下之西東向引進啓皇太子興立於
座前贊禮唱鞠躬拜興拜興平身蕃王鞠躬樂作拜興
拜興平身樂止皇太子立受引禮引蕃王至殿西門內
贊接引至皇太子座前內贊唱跪蕃王跪稱茲遇詣皇
太子殿下訖內贊唱俛伏興平身蕃王俛伏興平身內
贊引蕃王出殿門引禮引蕃王復位贊禮唱鞠躬拜興
拜興平身蕃王鞠躬樂作拜興拜興平身內贊唱鞠躬

拜興拜興平身皇太子答拜鞠躬拜興拜興平身樂止
引禮引蕃王出引進啓皇太子就座引禮引蕃國從官
就位贊禮唱鞠躬拜興拜興拜興拜興平身蕃國從官
皆鞠躬樂作拜興拜興拜興平身樂止贊禮唱禮
畢引禮引蕃國從官出引進啓禮畢皇太子興樂作出
殿門樂止引禮引文武官以次出

見諸王儀注

前期王府官設蕃王及從官次于府門外設王座于正

殿東稍北西向設蕃王座于正殿西稍南東向設蕃王
拜位于殿上稍南東向設王答拜位于殿上稍北西向
設蕃國從官拜位于殿門外北向設內贊二人位于殿
上之東西承傳二人位于殿門外之東西設接伴舍人
位于內贊之南東西相向設引從官二人位于從官拜
位之北東西相向設王府官侍立位于殿上之左右東
西相向是日所司陳設儀仗于殿門外之東西接伴舍
人引蕃王及從官至王府門外執事者先入就位王府

官啓王服皮弁服出升殿就座接伴舍人引蕃王入至
殿下由西階升王府王興降座出迎于殿門外既見王
府官引王由中門入接伴舍人引蕃王由西門入各就
拜位內贊唱鞠躬拜興拜興平身蕃王鞠躬拜興拜興
平身王答拜鞠躬拜興拜興平身王府官啓王就座接
伴舍人亦引蕃王就座引班引蕃國從官至殿門外拜
位北向立承傳唱鞠躬拜興拜興拜興拜興平身蕃王
從官皆鞠躬拜興拜興拜興拜興平身承傳唱禮畢接

引舍人引蕃王興詣王座前王府官啟王降座立舉手
揖畢王還府接伴舍人引蕃王出王府官送至門外蕃
國從官後從至館

見宰輔以下儀注

蕃王見諸王訖接伴舍人引蕃王詣中書省見丞相前
期禮部官於中書省後堂設蕃王座於省堂之西東向
設省官座於省堂之東西向接伴舍人引蕃王至省門
外先遣入報省官出迎于省門之外接伴舍人贊禮引

蕃王及丞相俱入蕃王升自西階省官升自東階至正堂蕃王東向立省官西向立贊禮唱鞠躬拜興拜興平身蕃王及省官皆鞠躬拜興拜興平身蕃王詣省官前致謁見之意畢引蕃王省官入後堂就座贊引引蕃國從官至省堂前楹北向立贊禮唱鞠躬拜興拜興平身蕃國從官皆鞠躬拜興拜興平身贊禮引蕃國從官立於蕃王之後禮部官供茶飲畢接伴舍人及贊禮引蕃王出蕃王降自西階省官降自東階送至省門外各舉

手揖蕃王上馬省官還其見三公大都督御史大夫其儀皆與上同凡京官五品以上與蕃王相見皆蕃王在西京官在東行再拜禮六品以下蕃王在北京官在南行再拜禮蕃王皆答拜其蕃國從官與京官相見之儀具蕃使來貢篇

宴會儀注

擇日錫宴蕃王於謹身殿拱衛司於殿庭左右設黃麾仗內使擊執如奉天殿受朝之儀內使監陳設御座于殿

中設皇太子座于御座東偏西向稍南設諸王座以次而南皆西向又于御座西偏設諸王座與東偏諸王相對以次而南皆東向設蕃王座于殿中之西第一行東向次設文武一品階宴座于第二行東西相向二品陪宴于第三行東西相向于西廡設蕃國從官座及文武官三品陪宴官依序坐以北為上俱東向和聲郎于殿之南楹陳大樂細樂及歌舞隊光祿寺設御酒尊于殿中之南設皇太子諸王蕃王文武一品二品官酒尊于

殿左右門之東西御位司壺二人尚酒尚食二人東偏
皇太子諸王司壺一人奉酒奉食二人西偏諸王司壺
一人奉酒奉食二人蕃王司壺一人奉酒食一人文武
官第一行各司壺四人兼供酒食文武官左右第二行
各司壺四人兼供酒食光祿寺直長西廡各置酒尊及
設司壺供酒食之人光祿寺卿陳御食案及皇太子諸
王食案及寺丞設蕃王食案于殿中直長設殿上左右
文武官食案各置於座前西廡蕃國從官文武官食案

亦各設于座前諸執事各供事舍人引文武百官常服侍立於殿門之左右舍人引蕃王服其國服侍立于百官之北引進引皇太子諸王常服侍立于殿內之左右侍儀導引皇帝常服陞御座大樂鼓吹振作鳴鞭樂止皇太子諸王各就座位禮部官取旨導蕃王入就座位丞相率禮部尚書光祿卿舉御食案進於御前禮部侍郎光祿少卿舉食案各進于皇太子諸王之前禮部郎中光祿寺丞舉食案進于蕃國王前殿上文武官及西

廡蕃國從官文武以次官各就座位內使監令于御前
斟酒司壺于皇太子諸王蕃王及文武官前各斟酒細
樂作奏太清之曲和聲郎北面立舉手唱上酒皇帝舉
第一爵飲皇太子及蕃王以下皆飲畢樂止內使監令
又于御前斟酒司壺于皇太子諸王蕃王文武官前各
斟酒細樂作奏感皇恩之曲和聲郎唱上酒皇帝舉第
二爵飲皇太子及蕃王以下皆飲畢樂止內使監令于
御前進食供食者於皇太子諸王蕃王文武官前各供

食大樂作和聲郎唱上食皇帝進食皇太子及蕃王以下食畢樂止內使監于御前斟酒司壺各斟酒細樂作奏賀聖朝之曲和聲郎唱上酒皇帝舉第三爵飲皇太子及蕃王以下皆飲畢樂止進食奏大樂如前內使監于御前斟酒司壺各斟酒細樂作舞諸國來朝之舞和聲郎唱上酒皇帝

舉第五爵飲皇太子及蕃王以下皆飲畢樂止進食奏大樂如前內使監令復斟酒司壺各斟酒細樂作奏朝天子之曲和聲郎唱上酒皇帝舉第六爵飲皇太子及蕃王以下皆飲畢樂止內使監令又斟酒司壺各斟酒細樂作奏醉太平之曲舞長生隊之舞和聲郎唱上酒皇帝舉第七爵飲皇太子及蕃王以下皆飲畢樂舞止進食奏大樂如前其西廡斟酒進食其次如殿上但不作樂宴畢皇帝興樂作皇太子諸王侍從還宮樂止引

禮引蕃王出引禮引文武百官以次出蕃王還館

東宮賜宴儀注

皇帝賜蕃王宴畢東宮擇日宴蕃王是日宿衛陳甲士
兵仗于東宮門外陳旗幟于中門外將軍六人於殿門
外之東西拱衛司陳設儀仗于殿下之東西及殿前殿
門之東西內使監設皇太子座于殿上正中設諸王座
于皇太子座東偏以次而南皆西向又設諸王座于皇
太子座西偏與東偏諸王相對皆東向又設蕃王座于

西偏諸王之下東向次設三師賓客諭德位于殿上第二行東西相向於西廡下設蕃國從官及宮官以序座北上東向和聲郎于殿之南楹陳大樂細樂及舞隊光祿寺官設皇太子酒尊於殿中之南設諸王蕃王三師等官酒尊于殿門之左右皇太子司壺二人尚酒食二人東偏諸王司壺一人奉酒食二人西偏諸王司壺一人奉酒食二人蕃王司壺一人奉酒食一人三師等官左右司壺各四人兼供酒供食光祿直長於西廡置酒

尊食案及司壺供酒食之人光祿寺官於殿上陳皇太子食案及諸王蕃王食案直長于殿上三師座前預設酒案西廡蕃國從官及宮官食案亦各設于座前諸執事各供事舍人引三師等官服常服侍立于殿門之左右舍人引蕃王服其國服立於三師之北引進引諸王常服侍立于殿內之左右引進導引皇太子常服出樂作陞座樂止諸王各就位坐禮部侍郎啓知引蕃王入就座禮部侍郎光祿少卿舉食案進于皇太子之前禮

部郎中光祿寺丞舉食案各進於諸王及蕃王之前三師等官各就座蕃國從官及宮官各就西廡坐內使監官于皇太子前斟酒司壺于諸王蕃王及三師等官前各斟酒大樂作樂工北面舉手唱上酒皇太子舉第一盞諸王蕃王及三師等官皆上酒飲畢樂止內使監又於皇太子前斟酒司壺於諸王蕃王及三師等官前斟酒細樂作樂工唱上酒皇太子舉第二盞諸王蕃王及三師等官皆上酒飲畢樂止內使監于皇太子前進食

供食者于諸王蕃王及三師等官前各供食大樂作樂
工唱上食皇太子進食諸王蕃王及三師等官各進食
食畢樂止內使監及執事者各斟第三盞至第七盞酒
及供食樂作樂止並如上儀唯酒第五行第七行雜行
諸隊舞凡酒七行食五品西廡蕃國從官及宮官皆酒
七行食五品惟不作樂宴畢引進啓禮畢皇太子興樂
作諸王從還宮樂止引禮引蕃王及從官出三師宮官
以次出蕃王還館

省府臺宴會儀注

東宮宴蕃王畢中書省取旨宴勞前期有司於中書省後堂陳蕃王及省官座次賓西主東設酒案于省堂正中食案列于酒案之前又設諸蕃官及左右司官座次于左司賓西主東設酒案于左司正中食案列于酒案之前教坊司陳樂于省堂及左司之南楹都堂遣官詣會同館請蕃王赴宴至省門下馬省官出迎于省門之外執事者引蕃王及省官俱入左右司等官與蕃國從

官各從其後蕃王升自西階省官升自東階至席前省
官主宴者詣蕃王前致禮待之意畢各就座左右司官
與蕃國從官至左司左司郎中詣從官前致禮待之意
畢各就座禮部官二人舉食案進供于蕃王及省官之
前執事者斟酒細樂作飲畢樂止執事者再斟酒樂作
樂止如初飲畢執事者進食大樂作食畢樂止酒七行
食五品行酒奏細樂進食奏大樂惟第五第七行雜陳
諸戲左司酒七行食五品行酒作細樂進食作大樂不

陳雜戲宴畢執事者引蕃王降自西階省官降自東階
送蕃王至省門外蕃國從官從其後遣官一員送蕃王
至會同館都督府禮待儀同前但各衛官屬戎服盛陳
兵仗于門內外之東西蕃國從官受宴于經歷司御史
臺禮待儀亦同前但不陳兵衛蕃國從官亦受宴于經
歷司

陞辭儀注

蕃王將還國禮部官奏知戒蕃王某日陞辭仍於天界

寺習儀訖前期内使監設御座香案於奉天殿如常儀
尚寶司設寶案于御座前侍儀司設蕃王拜位于丹墀
中道稍西及殿上御座前俱北向設蕃國從官拜位于
蕃王後中道之東西依序重行北向設承制官位于殿
上之東西向設文官侍立位於文樓之北西向北上武
官侍立位於武樓之北東向北上殿前班指揮司官三
員位于丹陛上東向光祿司官三員位于丹陛上西向
侍從班起居注殿中侍御史尚寶卿位于殿上西向指

揮司懸刀武官位于殿上東向拱衛司官位于奉天殿門之左右東西相向典牧所官位于仗馬之前東西相向宿衛鎮撫位于丹陛東西階下東西相向護衛百戶二十四員於宿衛鎮撫之南稍後東西相向護衛千戶八員位于殿東西門之左右東西相向知班二人位于蕃王拜位之北東西相向贊禮二人位于知班位之北東西相向典儀二人位于丹陛上之南東西相向內贊二人位于殿上東西相向引蕃王舍人位于蕃王之北

東西相向引蕃王從官舍人位于從官之北東西相向
引文武班舍人位于文武班之北稍後東西相向鳴鞭
四人位于丹陛上之南北向天武將軍四人位于丹陛
上之西隅東西相向將軍二人于殿上簾前東西相向
將軍六人于奉天殿門之左右東西相向將軍六人于
奉天門之左右東西相向是日金吾衛陳設甲士於午
門外之東西列旗仗於奉天門外之東西拱衛司陳儀
仗于丹陛上及丹墀之東西陳五輅于丹陛之南典牧

所陳仗馬於文武樓之南東西相向陳虎豹于奉天門外和聲郎陳樂于丹墀蕃王拜位之南擊鼓初嚴催班舍人催文武官各具朝服擊鼓次嚴引班引文武百官依品從齊班于午門外以北為上東西相向殿前班指揮光祿卿通班贊禮典儀內贊宿衛鎮撫護衛鳴鞭殿內外將軍各執事人俱入就位接伴舍人及引班引蕃王及蕃國從官立于午門外諸侍衛官各服其器服及尚寶卿侍從官入詣謹身殿奉迎擊鼓三嚴引班引文

武官入就侍立位引班舍人引蕃王及從官由午門西
入金水西橋奉天西掖門至丹墀之西俟立侍儀版奏
外辦御用監官跪奏皇帝服通天冠絳紗袍御輿以出
尚寶卿捧寶及侍儀侍衛導從如常儀皇帝將出仗動
大樂鼓吹振作陞御座樂止將軍捲簾尚寶以寶置于
案鳴鞭報時雞唱訖引班引蕃王及從官各就拜位贊
禮唱鞠躬拜興拜興拜興拜興平身蕃王及從官鞠躬
樂作拜興拜興拜興平身樂止引班引蕃王由西

陛陞樂作西門入引班立侍於門外內贊接引蕃王至御座前立定樂止內贊唱鞠躬拜興拜興平身蕃王鞠躬樂作拜興拜興平身樂止內贊唱跪蕃王跪承制官

前跪承制詣蕃王前宣制

云云

訖或有賜物就宣

內贊唱俛伏

興鞠躬拜興拜興平身蕃王鞠躬樂作拜興拜興平身內贊引蕃王自西門出樂作引班引復位樂止贊禮唱鞠躬拜興拜興拜興平身蕃王蕃國從官皆鞠躬樂作拜興拜興拜興平身樂止贊禮唱禮畢侍儀

奏禮畢皇帝興樂作警蹕侍從導引至謹身殿樂止引班引蕃王及蕃國從官出引文武官以次出

辭東宮儀注

蕃王詣闕陛辭訖次辭東宮前期內使監設皇太子位于東宮正殿侍儀司設蕃王拜位于殿門外設蕃國從官拜位于殿下中道之東西北向文武侍從班于殿庭之東西俱相向贊禮二人位于蕃王拜位之北東西相向承傳二人位於殿下東西相向引蕃王舍人二人位

于蕃王拜位之北東西相向引蕃國從官二人位于從
官拜位之北東西相向引文武侍從班四人位于文武
班之北稍後東西相向是日宿衛陳甲士兵仗于東宮
門外陳旗幟于中門外將軍六人于殿門外之東西拱
衛司陳設儀仗于殿下之東西及殿前殿門之東西樂
工設樂于殿庭之南執事者各入就位引班引文武官
常服侍從于殿下之東西引班引蕃王服國服至東宮
門外立位內使監令啓知皇太子常服出宮仗動樂作

陞座樂止引禮二人引蕃王及從官就位初行樂作就
位樂止引進啓皇太子立于座前贊禮唱鞠躬拜興拜
興拜興拜興平身蕃王鞠躬樂作拜興拜興拜興
平身樂止皇太子受前二拜答後二拜皇太子答拜時
內贊唱如儀引禮引蕃王出就次引進啓皇太子就座
引禮引蕃國從官入就位贊禮唱鞠躬拜興拜興拜興
拜興平身從官鞠躬樂作拜興拜興拜興拜興平身樂
止贊禮唱禮畢引禮引蕃國從官出引進啓禮畢皇太

子興樂作侍從導引還宮樂止引禮引文武侍從官以
次出

勞送出境

蕃王辭東宮畢中書省官率禮部官送出國門外至龍
江驛省臣還禮部官設宴如初至之儀宴畢禮部官還
應天府官送起行

蕙田案此洪武二年所定制也明史禮志會
典續文獻通考所載互有詳略而明集禮較

詳故采錄之

明史禮志洪武二十七年四月以舊儀煩命更定凡蕃國來朝先遣禮部官勞於會同館明日各具其國服如嘗賜朝服者則服朝服於奉天殿朝見行八拜禮畢即詣文華殿朝皇太子行四拜禮見親王亦如之王立受答後二拜從官隨蕃王後行禮凡遇宴會蕃王居侯伯之下

續文獻通考是時四夷朝貢東有朝鮮日本南有暹羅

琉球占城真臘安南瓜哇西洋瑣里三佛齊渤泥百花
覽邦彭亨淡巴須文達那凡十七國其西南夷隸四川
者軍民府凡六烏蒙烏撒芒部印部普安東川安撫司
一曰金筑宣撫司一曰酉陽宣慰司三曰貴州播州石
柱招討司三曰天會六番長沙土酋長官司凡三十盧
山募役西堡大華寧谷塞頂營十二營平茶程番康佐
木瓜方番昔亦簇占藏先結簇恪匝簇北定簇祁門簇
阿昔洞簇勒都簇班班簇者多簇麥匝簇泥溪雷坡沐

川平夷蠻夷岳希蓬隴木頭靜川府四德昌馬湖建昌
會川州十九永順龍永寧鎮寧建安禮伯興黎里闊武
安永昌隆姜黎溪會里威龍昌普濟衛一曰建昌縣三
中碧舍麻龍其隸廣西者府三田州思明鎮安州二十
五龍英江龍養利上下凍思陵萬承安平太平都結思
城結倫鎮遠左茗盈南丹結安思同東蘭那地全茗利
泗城奉義縣四陀陵羅陽崇善永康隸雲南者軍民府
一曰姚安府八元江麗江景東楚雄鶴慶尋甸大理臨

安宣慰使司三平緬車里八百州二姚鄧土官三海東
賓居小雲南縣二廣通習義隸湖廣者宣慰使司四思
南施南永順安靖安撫司一忠建長官司三臻部六洞
黃坡等處軍民府一曲靖西域之部七西天泥巴喇國
系甘沙州烏斯藏薩里薩喇輝和爾賽瑪爾堪帝以舊
儀頗煩故復命更定

蕙田案以上明外藩朝見

右明

五禮通考

卷二百二十三

五禮通考卷二百二十三